

N138 2014 წლის 10 თებერვალი ქ. თბილისი

**„ეკონომიკური საბჭოს შექმნისა და მისი დებულების დამტკიცების
თაობაზე“ საქართველოს მთავრობის 2013 წლის 31 დეკემბრის N394
დადგენილებაში ცვლილების შეტანის შესახებ**

მუხლი 1. „ნორმატიული აქტების შესახებ“ საქართველოს კანონის მე-20 მუხლის მე-4 პუნქტის შესაბამისად, „ეკონომიკური საბჭოს შექმნისა და მისი დებულების დამტკიცების თაობაზე“ საქართველოს მთავრობის 2013 წლის 31 დეკემბრის N394 დადგენილებაში (შემდგომში – დადგენილება) www.matsne.gov.ge, 31/12/2013, სარეგისტრაციო კოდი: 010220030.10.003.017561) შეტანილ იქნეს შემდეგი ცვლილება:

1. დადგენილების პირველი მუხლი ჩამოყალიბდეს შემდეგი რედაქციით:

„მუხლი 1.

„საქართველოს მთავრობის სტრუქტურის, უფლებამოსილებისა და საქმიანობის წესის შესახებ“ საქართველოს კანონის მე-5 მუხლის „თ“, „ი“ და „კ“ ქვეპუნქტების, მე-6 მუხლის პირველი პუნქტისა და 29-ე მუხლის პირველი პუნქტის შესაბამისად, ქვეყნის ეკონომიკური პოლიტიკისა და ეკონომიკური სტრატეგიის დაგეგმარებისა და მათი შემუშავების კოორდინაციის მიზნით, შეიქმნას ეკონომიკური საბჭო (შემდგომში – საბჭო) შემდეგი შემადგენლობით:

საქართველოს პრემიერ-მინისტრი – საბჭოს თავმჯდომარე;

საქართველოს ფინანსთა მინისტრი – საბჭოს წევრი;

საქართველოს ეკონომიკისა და მდგრადი განვითარების მინისტრი – საბჭოს წევრი;

საქართველოს ენერგეტიკის მინისტრი – საბჭოს წევრი;

საქართველოს რეგიონული განვითარებისა და ინფრასტრუქტურის მინისტრი – საბჭოს წევრი;

საქართველოს სოფლის მეურნეობის მინისტრი – საბჭოს წევრი;

საქართველოს გარემოსა და ბუნებრივი რესურსების დაცვის მინისტრი – საბჭოს წევრი;

საგადასახადო ომბუდსმენი – საბჭოს წევრი;

საქართველოს სავაჭრო-სამრეწველო პალატის პრეზიდენტი – საბჭოს წევრი;

სსიპ – სახელმწიფო ქონების ეროვნული სააგენტოს თავმჯდომარე – საბჭოს წევრი;

სს „საქართველოს ნავთობისა და გაზის კორპორაციის“ გენერალური დირექტორი – საბჭოს წევრი;

სს „საპარტნიორო ფონდის“ აღმასრულებელი დირექტორი – საბჭოს წევრი;

სს „საქართველოს რკინიგზის“ გენერალური დირექტორი – საბჭოს წევრი;

საქართველოს პრემიერ-მინისტრის თანაშემწე ეკონომიკურ საკითხებში – ეკონომიკური საბჭოს მდივანი – საბჭოს წევრი.“

2. დადგენილებით დამტკიცებული „ეკონომიკური საბჭოს დებულების“ (შემდგომში – დებულება) მე-2 მუხლი ჩამოყალიბდეს შემდეგი რედაქციით:

„მუხლი 2. საბჭოს უფლებამოსილება

საბჭოს ძირითადი ამოცანები და ფუნქციებია:

ა) ქვეყნის საგარეო და შიდა ეკონომიკური პოლიტიკისა და ეკონომიკური სტრატეგიის დაგეგმარება და მათი შემუშავების კოორდინაცია;

ბ) ქვეყნის შიდა ეკონომიკური განვითარების, ქვეყნის მაკროეკონომიკური მაჩვენებლების ანალიზი;

გ) შესაბამის უწყებებთან ერთად ქვეყნის დარგობრივი სტრატეგიის შემუშავებისა და მისი განხორციელების პროცესში მონაწილეობა;

დ) ეკონომიკური რისკებისა და საინვესტიციო გარემოს ანალიზი;

ე) ქვეყნის შიდა ეკონომიკური მიმართულებების პრიორიტეტების განსაზღვრასა და შესაბამისი გეგმების შემუშავებაში მონაწილეობა;

ვ) საერთაშორისო სავალუტო ფონდთან, მსოფლიო ბანკის მისიებსა და სხვა ეკონომიკური პროფილის საერთაშორისო წარმომადგენლობებთან კომუნიკაცია;

ზ) საგარეო და შიდა ეკონომიკური კუთხით რეფორმების მიმართულებების ანალიზი;

თ) ორმხრივი და მრავალმხრივი ეკონომიკური კავშირების, საერთაშორისო ხელშეკრულებების ანალიზი და მათ მომზადებაში მონაწილეობა;

ი) შესაძლო და პერსპექტიული საგარეო ეკონომიკური კავშირების ანალიზი;

კ) საზღვარგარეთ მიმდინარე ეკონომიკური პროცესებისა და ქვეყანაში მიმდინარე ეკონომიკურ პროცესებზე მათი შესაძლო გავლენის ანალიზი;

ლ) საქართველოს ენერგოდერეფნის გავლით ტრანზიტით გატარებული ენერგომატარებლების მოცულობებთან დაკავშირებით არსებული მდგომარეობის შესწავლა;

მ) მიმდინარე ტენდენციების დადგენა ენერგომატარებლების თითოეული ტიპის, მათი წარმომავლობის ქვეყნის, საბადოს ან ნავთობგადამამუშავებელი ქარხნის მიხედვით;

ნ) სხვადასხვა ტიპისა და წარმოშობის ენერგომატარებლებთან დაკავშირებით პრობლემების იმ ერთობლიობის იდენტიფიცირება, რომლებიც ზღუდავს არსებული სატრანსპორტო მოცულობების ზრდას;

ო) ახალი სატრანსპორტო პერსპექტივების ანალიზი;

პ) ჩატარებული კომპლექსური ანალიზის საფუძველზე კონკრეტული რეკომენდაციების შემუშავება განსახორციელებელი ღონისძიებების შესახებ, რომლებიც სხვა საკითხებთან ერთად მოიცავს:

პ.ა) სატრანზიტო კომპანიებთან ენერგოდერეფნის მიმზიდველობის გაზრდის მიზნით გასატარებელ სამუშაოებს, როგორც საქართველოში, ასევე კასპიის ზღვის სხვა ქვეყნებში;

პ.ბ) სატრანზიტო ქვეყნებთან შესაბამის საკითხებზე ურთიერთობის სტრატეგიას;

პ.გ) სატრანზიტო კომპანიებთან ურთიერთობის სტრატეგიას;

პ.დ) აუცილებლობის შემთხვევაში, კონკრეტულ საკითხთან დაკავშირებით, ევროკავშირსა და აშშ-სთან თანამშრომლობის პერსპექტივების ანალიზს ენერგორესურსების ევროპისთვის მიწოდების მარშრუტების დივერსიფიკაციის სფეროში, მათი ინტერესების გათვალისწინებისა და გამოყენების მიზნით;

ჟ) საქართველოს გავლით დღეისათვის არსებული გრძელვადიანი სატრანზიტო პროექტების და გაზის მოწოდების საკონტრაქტო პირობების შესწავლა და მათი გაუმჯობესების პერსპექტივების დადგენა;

რ) საქართველოში ნავთობისა და გაზის მოპოვების გაზრდის შესაძლებლობების შესწავლა და კონკრეტული რეკომენდაციების შემუშავება;

ს) შესაბამისი სამუშაოების ჩატარების პროცესში საერთაშორისო ექსპერტების, სპეციალისტებისა და მრჩეველების ჩართვა, საჭიროებისამებრ;

ტ) ქვეყნის ეკონომიკურ სფეროში საქართველოს სამინისტროების, აფხაზეთისა და აჭარის ავტონომიური რესპუბლიკების, ადგილობრივი თვითმმართველობის ორგანოებისა და სხვა სახელმწიფო უწყებების საქმიანობაზე კონტროლის განხორციელება;

უ) მინიჭებული ფუნქციების შესრულების მიზნით, ყველა სახელმწიფო ან ადგილობრივი თვითმმართველობის ორგანოს ან დაწესებულებისგან, აგრეთვე ნებისმიერი ფიზიკური ან იურიდიული პირისაგან, რომელიც საქართველოს კანონმდებლობის შესაბამისად ასრულებს საჯარო-სამართლებრივ უფლებამოსილებას, საჭირო ინფორმაციისა და დოკუმენტაციის გამოთხოვა;

ფ) ქვეყნის ეკონომიკური სფეროს მარეგულირებელი კანონების და სხვა ნორმატიული აქტების პროექტების განხილვა. აგრეთვე, საქართველოს სახელმწიფო ბიუჯეტის პროექტის დაგეგმარების/მომზადების ზედამხედველობა და კოორდინაცია;

ქ) კომპეტენციის ფარგლებში საქართველოს მთავრობის სხდომაზე განსახილველ ცალკეულ საკითხთა შესწავლა და შესაბამისი ინფორმაციის წარდგენა საქართველოს პრემიერ-მინისტრისათვის;

ღ) მის კომპეტენციას მიკუთვნებულ საკითხებზე წინადადებებისა და რეკომენდაციების წარდგენა საქართველოს პრემიერ-მინისტრისათვის;

ყ) კომპეტენციის ფარგლებში საქართველოს პრემიერ-მინისტრის ცალკეულ დავალებათა შესრულება.“

3. დადგენილებით დამტკიცებული დებულების მე-3 მუხლის მე-2 პუნქტი ჩამოყალიბდეს შემდეგი რედაქციით:

„2. საბჭოს მუდმივი წევრები არიან: საქართველოს პრემიერ-მინისტრი, საქართველოს ფინანსთა მინისტრი, საქართველოს ეკონომიკისა და მდგრადი განვითარების მინისტრი, საქართველოს ენერგეტიკის მინისტრი, საქართველოს რეგიონული განვითარებისა და ინფრასტრუქტურის მინისტრი, საქართველოს სოფლის მეურნეობის მინისტრი,

საქართველოს გარემოსა და ბუნებრივი რესურსების დაცვის მინისტრი, საგადასახადო ომბუდსმენი, საქართველოს სავაჭრო-სამრეწველო პალატის პრეზიდენტი, სსიპ – სახელმწიფო ქონების ეროვნული სააგენტოს თავმჯდომარე, სს „საქართველოს ნავთობისა და გაზის კორპორაციის“ გენერალური დირექტორი, სს „საპარტნიორო ფონდის“ აღმასრულებელი დირექტორი, სს „საქართველოს რკინიგზის“ გენერალური დირექტორი, საქართველოს პრემიერ-მინისტრის თანაშემწე ეკონომიკურ საკითხებში - ეკონომიკური საბჭოს მდივანი.“

მუხლი 2. დადგენილება ამოქმედდეს გამოქვეყნებისთანავე.

პრემიერ-მინისტრი

ირაკლი ღარიბაშვილი